


TINAN B DOMINGU XX TEMPU KOMÚN NIAN 2012 SOLENIDADE S. JOÃO BAPTISTA NIAN

Tema Solenidade S. João Baptista nian

Iha solenidade ne'e, Maromak nia liafuan apresenta mai ita figura profética João Baptista nian. Maromak hili nia atu sai profeta molok nia moris, nia maka "Maromak nia presente" ida ba nia Povu. Hodi subliña João nia importánsia iha istória salvasaun nian, liturjia hatudu mai ita katak nia la'ós "salvasaun"; nia mai de'it atu dirije ema nia hateken ba Kristu no prepara ema sira nia fuan atu simu "salvasaun" ne'ebé atu to'o mai. **Leitura dahuluk** apresenta mai ita figura profética misterioza ida, ne'ebé Maromak hili husi kedas inan nia knotak, atu sai "roman ba nasaun sira" no lori Liafuan ba ema sira nia fuan no moris. Impresiona tebes sentralidade ne'ebé Maromak asume iha profeta nia vida: misaun profética hotu suli husi Maromak no hetan apoiu husi Maromak. Iha **leitura daruak**, Paulo ko'alia ba judeu sira Antioquia nian kona-ba profeta João. Iha Paulo nia perspetiva, João nia misaun konsise iha tene ema sira ba mudansa vida no mentalidade nian, nu'udar ain-hakat dahuluk atu simu "Reinu" ne'ebé Jezús mai atu propoin. Paulo hatudu momoos katak João la'ós Mesias libertadór, maibé ida-ne'ebé mai atu prepara ema nia fuan sira atu simu Mesias. **Evanjellu** relata João nia moris. Iha Lucas nia perspetiva, akontesimentu sira liga ho nia moris hatudu katak profeta João maka "presente ida Maromak nian". Husi tempu ne'ebá, sai klaru ba ema hotu katak Maromak mak iha João nia ezisténsia nia kotuk, no katak ninia misaun maka sinál ida Maromak nian iha ema sira nia leet.



Alvise Vivarini, S. Giovanni Battista, 1475, Museo Thyssen-Bornemisza, Madrid

LEITURA I – Is 49,1-6

AMBIENTE

Iha livru Deutero-Isaías nian (profeta ida ne'ebé ezerse ninia ministériu iha faze finál eziliu nian, iha sék. VI mK nia klaran), ita hetan poema/dadolin tolu autór koñese-laek ida, ne'ebé apresenta mai ita figura mizterioza "atan" ida Jahwéh nian. Nia figura ida identifika-laek, bele figura individuál (hanesan Jeremias, ka Deutero-Isaías rasik) ka figura kolektiva ida (hodi representa n.e., profeta hotu ne'ebé Maromak haruka, ka Maromak nia povu rasik). Testu sira apprezenta figura profética misterioza ne'e nu'udar ema ida be Maromak bolu atu fó sasin kona-ba Liafuan. "Atan" ne'e nia misaun iha karakter universál no realiza iha terus no saran an ba Liafuan no ba Maromak nia projetu sira; maibé atan ne'e nia terus la leet de'it, no iha signifíkadu kasu-sala nian no maksoin nian. Husi terus ne'ebé hakmaluk "atan" nia misaun, maka mai perdaun ba povu nia sala. Maromak apresia "atan" nia sakrífisiu, sei fó rekompensa ba nia ba ninia doasaun moris nian, sei foti sa'e nia iha ema hotu nia matan no halo nia manán ninia funu-balun no adversáriu sira. Maski la klaru delimitasaun ezatu dadolin haat "Jahwéh nia atan nian", ita bele aseita katak testu sira ne'e mak Is 42,1-9, 49,1-13, 50,4-11 no 52,13-53,12. Testu

ne'ebé ohin propoin mai ita maka parte daruak dadolin daruak “Jahwéh nia atan nian”, figura misterioza Maromak nia “atan” ne'ebé hetan bolun ba misaun profétika aprezena iha testu ne'e.

MENSAJEN

Ita-nia testu aprezena relatu vokasaun “Jahwéh nia atan” nian. Hanesan akontese iha relatu seluk vokasaun nian, “atan” hatudu konviksaun katak Maromak bolu nia husi kedas “inan nia knotak” (vers. 1). Ne'e dehan katak ema bele komprende vokasaun profétika nu'udar Maromak nia inisiativa mesak, ne'ebé husi kedas inisiu ezisténsia nian nia “kaer toman” ema no destina nia ba misaun iha mundu. Tan ne'e, misaun profétika la'ós ema nia inisiativa ka rezultadu husi ema nia méritu sira, maibé buat ruma ne'ebé iha ninia orijen iha Maromak. Serteza ne'e maka pontudepartida ba asaun profétika hotu. Misaun ne'ebé profeta simu bolun liga ho Maromak nia Liafuan (vers. 2). Profeta mak ema ne'ebé Maromak hili, atu ninia Liafuan to'o ba ema hotu; liuhusi nia, Maromak dirije ninia proposta sira no propin ba ema sira dalan ida ne'ebé lori sira atu moris iha relasaun ho Maromak. Maromak nia Liafuan ida-ne'e ne'ebé sai husi profeta nia ibun la'ós liafuan emak/umanu, maibé Maromak nia Liafuan; tanba ne'e maka profeta hateten katak nia ibun hanesan “surik kro'at ida”, ka “rama-hana oan ne'ebé tamaroborus”. Imajen sira ne'ebé uza bele refere ba Maromak nia Liafuan nia kbiit, ne'ebé tama borus fuan sira no la iha kbiit ida bele teri netik. Iha konkretizasaun misaun nian, profeta koko persegisaun, inkomprensau, frakasu (kf vers. 4ab). Ne'e signifika katak profeta “lakon tempu” no halerik kona-ba ninia knaar? Lae; Nia konxiente katak nia la lakon buat ida, basá Maromak la husik atu proteje nia no selu ninia kolen loloos (kf vers. 4). Ba profeta buat ne'ebé importante maka kumpre ho fidelidade, misaun ne'ebé Maromak entrega ba nia no hanoin katak Maromak la husik nia mesak: se profeta hala'o misaun iha Maromak nia naran no soi Maromak nia apoiu, buat seluk sekundáriu de'it. Misaun ida-ne'ebé mak entrega ba profeta? Fundamentalmente, maka lori Jacob ba Jahwéh, halibur Israel ba Maromak (vers. 5). Karik iha ne'e refere mós ba misaun profeta oiain nian ne'ebé Maromak haruka ba nia povu, sira dala barak haka'as an saugate de'it atu lori fila fali Maromak nia Povu ba moris aliansa nian. Biar nune'e, misaun sai luan ba beibeik no sai universál (vers. 6), iha momentu ne'ebé Israel tama iha senáriu internasionál (iha faze ida-ne'e Maromak nia Povu iha eziliu iha rai estranjeiru). Buat ne'ebé Maromak atu realiza ba Isarel nia di'ak mak akontesimentu universál ida, vizivel ba nasaun hotu. Husi asaun maksoin Maromak nian, sei mosu naroman ida ne'ebé leno povu hotu, halo sira deskobre Maromak no adere ba Jahwéh.

ATUALIZASAUN

Durante reflesaun, konsidera elementu sira tuirmai ne'e:

- Ideia fundamentál ne'ebé natubu husi testu ne'e maka sertezza katak Maromak mak ida-ne'ebé hamriik iha esperiénsia profétika hotu nia kotuk... Maromak mak hili profeta no destina ba nia misaun ida, husi kedas inan nia knotak; Maromak maka tau Liafuan iha profeta nia ibun; Maromak maka proteje no fó rekompensa ba profeta... Imposivel ko'alia kona-ba profesia hodi la ko'alia kona-ba Maromak. Ha'u konxiente kona-ba Maromak nia sentralidade iha ha'u-nia moris?
- Profesia la'ós realidade ida rezerva de'it ba ema espeisial sira, maibé misaun ida ne'ebé natubu husi ha'u-nia kompromisu batizmál. Ha'u konxiente katak ha'u simu bolun atu sai profeta – katak, sai Maromak nia Liafuan moris?
- Maski iha terus, persegisaun, frakasu, misaun profétika maka “sai naroman ba nasaun sira”, atu Maromak nia maksoin “to'o ba rai tomak”. Ha'u-nia programa moris nian maka loos duni, sai ahi-lakan ida ne'ebé haroman mundu no fó esperansa ba ema sira? Ema kiak sira, ema marjinalizadu, ema moris iha injustisa, ema ne'ebé hetan esplorasau,, sira ne'ebé ema esklui... hetan iha ha'u sasin salvasaun Maromak nian ne'ebé liberta no soi sira?
- Atu Liafuan ne'ebé haklaken sai Maromak nia Liafuan, ha'u tenke moris iha relasaun komuñau no intimidade ho Maromak: ho de'it diálogu ida-ne'e ha'u nia moris sai nakonu ho Maromak, ha'u bele komprende Maromak nia projetu sira no bele haklaken ba em asira. Ha'u moris relasaun ida babesik

nian, diálogu nian ho Maromak? Buat ne'ebé ha'u tatoli no haklaken maka Maromak nia Liafuan sira, ka ha'u-nia liafuan, ha'u-nia eskema sira, ha'u-nia interese pesoál sira?

SALMU RESPONSORIÁL – Salmu 138

LEITURA II – Actos 13,22-26

AMBIENTE

Iha tinan 46, Paulo no Barnabé husik kominidade sarani Antioquia iha Síría nian atu bá Xipre ho ró, sira too iha Perje, parte ida Ázia Menór nian. Hafoin ho ain la'ó ba sidade interiór nian no to'ó ba Antioquia iha Pisídia. Iha sábadu ida “sira tama iha sinagoga sidade nian” (Act 13,14), atu partesipa liturjia sinagoga nian. Hetan konvite atu ko'alia, husi xefe sira sinagoga nian, Paulo aproveita atu haklaken Jezús ba kominidade judaika halibut iha ne'ebá (kf. Act 13,16-41). Testu ne'ebé propoin mai ita iha leitura daruak maka parte ki'ik ida husi diskursu tomak ne'ebé, Paulo haktuir iha kontestu ne'e. Ida-ne'e maka diskursu dahuluk Lucas tau iha Paulo niaibun; nia laran soi tema sira ne'ebé husi ne'e ba oin sei sai tema pregasaun nian ba jentiu sira.

MENSAJEN

Diskursu ne'ebé Lucas tau iha Paulo niaibun kontein, liuliu, reflesaun kona-ba Testamentu Tuan. Nia halo sínteze badak ida kona-ba “istória salvasaun” nian hodi hatudu ligasaun ruma, katak buat hotu nia tutun maka Jezús. Iha kontestu ida-ne'e maka mosu referénsia ba Batizta. Lucas apresenta nia nu'udar ida-ne'ebé mai prepara dalan ba Maromak, hodi propoin batizmu ida konversaun nian (espresaun grega “baptisma metanoías” refere ba transformasaun radikál mentalidade nian, atu proposta “Reinu” nian ne'ebé Jezús lori mai bele hetan simun iha ema hotu nia fuan no moris) ba povu Israel tomak (vers. 24). João Baptista la'ós Mesias ne'ebé ema hein, maibé profeta ne'ebé haklaken ida-ne'ebé sei mai tuir no iha-ne'ebé sente nia la soi “atu kore ninia sandália sira nia talin” (vers. 25). Espresaun ne'e hatudu profeta nia konxiénsia kona-ba nia an nu'udar Maromak nia instrumentu simples no frajil. Ita repara tan mós oinsá João haka'as an atu la hatudu ba nia an rasik maibé ba Kristu. Profeta nia misaun maka lori mundu nia matan la'ós ba nia diresaun rasik, maibé loos duni orienta ema nia fuan sira ba buat esensiál, ba Maromak.

ATUALIZASAUN

Testu nia reflesaun bele halo hahú husi indikasaun sira tuirmai ne'e:

- Profeta simu bolun atu fó sasin kona-ba Maromak iha ema nia leet mezmuke ema sira prefere ignora Maromak no harii sira-nia moris hodi tau sees Maromak. João Baptista, profeta, asume ho an tomak misaun atu fó sasin kona-ba Maromak: nia halibur ema sira atu hasoru Maromak ne'ebé halo an ba ema, konvida sira atu kolu sai egoíзму, loko an, auto-sufisiénsia, karak-teen no prepara sira-nia fuan atu simu proposta salvasaun ne'ebé mai husi Maromak, iha Jezús. Programa ne'e la lakon nia atualidade: apelu ba konversaun, atu halo revolusaun mentalidade no atitude sira-nian no konvite atu simu libertasaun ne'ebé Maromak oferese kontinua iha sentidu no sai núkleu esensiál anúnsiu profétiku nian. Ne'e mak ha'u-nia programa?

- Profeta mak instrumentu simples ida, limitadu, frajil, liuhusi nia Maromak hala'ó nia obra sira iha mundu. Ida-ne'e revela, husi sorin ida, katak Maromak manifesta an iha simplidade no iha frakeza no iha ne'ebá mak ita tenke buka Nia (Nia nunca hela iha poder, rikusoin, kbiit, prepoténsia, impozisaun); husi sorin seluk, ida-ne'e revela katak, profeta lalika foti an ka loko an: la'ós ninia qualidade sira maka sai determinante, maibe loos duni Maromak nia asaun.

- “Dalan profétiku” la halo hodi dada ema lubun-boot nia atensaun ba an rasik, hatudu an atu ema admira no hahí ita, manán susesu no mosu iha revista sosiál sira, promove imajen no trata ema sira

ne'ebé manda mundu ho "ó", hatudu sai kualidade boot sira no harí klube fan sira nian. Profeta maka Maromak nia "atan", ne'ebé subar iha senáriu nia kotuk enkuantu lori ema nia matan sira ba Maromak. Nia funsaun maka halo Maromak atrasaun ida ba ema sira nia matan...la'ós profeta ne'ebé tenke mosu mai; maibé husi nia, ema bele hasoru Maromak.

ALELUIA – cf Lc 1,76

Aleluia. Aleluia. «Ó, kosok-oan, ema sei hanaran ó Na'i Aas liu hotu nia profeta, Basá ó sei bá uluk Na'i Atu hadia dalan ba Na'i».

EVANJELLU – Lc 1,57-66.80

«Wainhira tempu to'o ona ba Isabel, nia tur ahi oan mane ida. Rona tiha katak Na'i hatudu laran luak boot ba nia, nia maluk no parente sira haksolok ho nia. Liutiha loron ualu, sira mai atu halo sirkunsizaun kosok oan nian. Sira hakarak hanaran nia Zacarias, hanesan nia aman; maibé nia inan dehan: "Lae, nia naran maka João." Sira dehan fali ba nia: "Iha imi-nia parente sira leet la iha ema ida ho naran ne'e." Tan ne'e, ho sinál oioin, sira husu ba nia aman oinsá nia hakarak hanaran nia oan. Nia husu surat-tahan ida hodi hakerek: "Nia naran João." Sira hotu hakfodak. Zacarias nia ibun nakloke kedas, nia nanál mamar fali, nia ko'alia hodi hawelok ba Maromak. Sira hotu ne'ebé hela besik ne'ebá tauk tebtebes. Lia hirak ne'e hotu naklekar iha foho rai Judeia tomak. Sira hotu ne'ebé rona buat hirak ne'e rai hela iha sira nia laran hodi dehan ba sira an rasik: "Labarik ne'e sei sai sá loos?" Basá, tebes duni, Na'i nia liman hela ho nia. Labarik sai boot, nia laran metin liu tan. Nia horik iha rai fuik maran to'o loron ne'ebé nia hatudu an ba Israel».

AMBIENTE

"Evanjellu Infánsia nian" iha Lucas nia versaun tau iha paralelu figura sira João no Jezús nian (iha João nia moris nia anúnsiu–kcf. Lc 1,5-25 – korresponde Jezús nia moris nia anúnsiu– kf. Lc 1,26-38; ba istória João nia moris– kf. Lc 1,57-80 – korresponde istória Jezus nia moris – kf. Lc 2,1-21). Paralelizmu ne'e serve atu haroman relasaun ne'ebé iha entre sira rua – relasaun ida ne'ebé reflesau ekleziál hakle'an no haluan husi kedas tradisaun uluk nian. Iha época Lucas hakerek, comunidade sarani sira koñese João nia eskolante sira. Sira nia atividade atu konverte ema to'o ba Ázia Menór (kf. Act 18,24-19,7). Karik iha ema balu ne'ebé konfunde João ho Meisas... Iha kontestu ne'e, comunidade Lucas nian hakarak halo klaru João nia papél relevante iha ekonomia salvasaun nian maibé, tempu hanesan, afirma João nia subordinasaun ba Jezús... Jezús nia superioridade hasoru João bele hetan, aliás, evidente liu iha diferensa entre relatu anúnsiu kona-ba João nia moris no relatu anúnsiu kona-ba Jezús nia moris; evidente mós iha enkontru entre Maria ho Isabel, iha-ne'ebé João nia inan rasik haklaken Maria nu'udar nia Na'i nia inan, hodi rekoñese nia oan-mane nia inferioridade hasoru Jezús (kf. Lc 1,39-45); klaru mós iha relevu ne'ebé evanjelista halo kona-ba Jezús nia moris (naruk, nakonu ho detalle no nakonu ho teolojia) kompara ho relatu João nia moris nian (konta badak, lariku iha detalle sira).

MENSAJEN

Relatu hahú hodi haktuir situasaun ksolok nian atu simu Zacarias no Isabel sira nia oan-mane nia moris (vers. 57-58). Ksolok– elementu karakterístiku ida teolojia Lucas nain – signifika katak to'o mai ona tempu foun sira atu Maromak nia promesa sira realiza duni, tempu Maromak nia laran-sadia nian. Iha momentu sirkunsizaun nian (loron da-8 liutiha moris, data legál sirkunsizaun nian tuir Gn 17,12 e Lv 12,3), mosu problema naran nian ne'ebé sei fó ba kosok-oan ne'e (iha Testamentu Tuan, fó naran ba labarik bainhira moris – kf. Gn 4,1; 21,3; 25,25-26; maibé iha ne'e mosu lisan elenista nian, ne'ebé judaizmu resente asume). Viziñu no parente sira hanoin katak labarik sei hanaran tuir nia aman. Isabel no Zacarias hili fali naran seluk: João (anju maka sujere naran ne'e bainhira hato'o lia-foun kona-ba nia moris –kcf. Lc 1,13). Nia signifikadu maka "Na'i haraik grasa": labarik ne'e maka "prezente ida husi Maromak" no sinál dahuluk Maromak nia grasa nian ne'ebé sei suli ba ema sira, liuhusi Mesias ne'ebé atu mai daudaun. Husi parte seluk, inan no aman nia lia ida de'it kona-ba naran ne'ebé la'ós familiár

hatudu katak ne'e inspirasaun Maromak nian. Hasoru João nia moris, Lucas nota ema hotu ne'ebé iha ne'ebá sira-nia hakfodak no ta'uk. Hakfodak (vers. 63) maka reasaun baibain ema lubun boot sira-nian hasoru milagre sira (kf. Lc 8,25.56; 9,43; 11,14; Act 3,10) no manifestasaun divina seluk (kf. Lc 24,12.41; Act 2,7); "ta'uk" (vers. 65) define atitude normál ema nian hasoru mistériu, hasoru tranxendente, hasoru Maromak (Lucas hatudu "ta'uk" hasoru revelasaun sira – kf. Lc 2,9; 9,34 – milagre sira – kf. Lc 5,26; 7,16; 8,25.37; 24,5.37 – no intervensaun divina seluk – kf. Act 5,5.11; 19,17). Kuadru sai kompletu ho indikasaun katak "Na'nia liman hela ho nia" (vers. 66). Espresaun ida-ne'e mai husi Testamentu Tuan atu hateten Maromak nia protesaun ba nia povu (kf. Sal 80,18; 139,5) no ninia asaun ba profeta sira (kf. 1 Re 18,46; 2 Re 3,15; Ez 1,3; 3,14.22; 8,1). Iha ne'e signífika katak João soi Maromak nia protesaun no Maromak horik iha nia no nia moris bele komprende de'it nu'udar inisiativa Maromak nian. Iha finál leitura nian (vers. 80a), apresenta fórmula ida uza atu halo rezume istória infánsia figura ruma ne'ebé iha papél importante iha istória salvasaun povu Maromak nian (Sansão – kf. Jz 13,24-25; Samuel – cf. 1 Sm 2,26). Iha mós referénsia ida kona-ba João nia vijen ba rai-fuik maran (vers. 80b); rai-fuik maran maka fatin ida iha-ne'ebé Israel halo esperiénsia enkontru nian ho Maromak libertadór, iha-ne'ebé sente ho forma spesiál Maromak nia domin no iha-ne'ebé Povu asume kompromisu aliansa nian: ida-ne'e mak esperiénsia ne'ebé João bá atu halo, no ikusmai apresenta ba nia Povu. Aleindisu, referénsia ba rai-fuik maran prepara ba João nia mamosuk iha Evanjellu, liutiha tinan 30 nune'e (kf. Lc 3,1-3). Iha relatu mosu, ho forma spesiál, Maromak nia sentralidade iha prosesu tomak. João maka "Maromak nia prezente" ida, mai ho misaun ida Maromak nian no sinál ida Maromak nia prezensa iha nia Povu nia leet.

ATUALIZASAUN

Ba reflesaun, konsidera liña sira tuirmai ne'e:

- João nia istória ko'alia mai ita, uluknanai, kona-ba Maromak ida ne'ebé hadomi ema sira no oferese ba sira projetu ida salvasaun nian no moris nakonu; tanba ne'e maka nia inventa forma umana atu ami hasoru ema sira, atu hato'o ba sira ninia Liafuan no proposta sira, atu husu no interpela sira ho ninia Liafuan profétika ... Hodi selebra solenidade ida-ne'e, ita selebra Maromak-domin, ne'ebé revela iha figura profeta João nian. Oinsá ho ha'u, ha'u nafatin sai ba maun-alin sira, "Maromak nia prezente" ida, sinál moris nian no profétiku Maromak nian ne'ebé hadomi sira no oferese ba sira salvasaun? Viziñu no "parente" sira hetan iha ha'u Maromak nia manifestasaun?
- Iha relatu João nia moris nian, haree moos Maromak nia sentralidade iha profeta nia vida, husik kedas inan nia knotak. Profeta mak ema ida Maromak nian, ninia moris nia hun maka Maromak, nia vokasaun iha sentidu d e'it iha Maromak nia roman, nia ai-han maka Maromak, nia liafuan sira maka Maromak nia liafuan sira. Ha'u konxinte katak Maromak tenke hela iha sentru ha'u-nia moris nian no ha'u-nia vokasaun profétika soi sentidu de'it se ha'u simu atu moris iha ligasaun "umbilikál" (husar nian) ho Maromak?
- Maski testu sira ohin nian la refere dimensaun ida-ne'e, konvein, iha solenidade ida-ne'e, reflète kona-ba oinsá João Baptista moris nia misaun profétika. Ninia karakteristik sira ne'ebé sadik liu maka hamamuk an, radikalidade, saran an totál ba misaun, aten-barani atu hasoru makaer ukun sira, nia kapasidade atu saran moris atu defende lialoos. Karakterístika sira-ne'e halo parte ba "dalan profétiku".
- Iha Lucas nia relatu, hatudu didi'ak diferensa entre João no Jezús... João la'ós salvasaun; nia mai atu fó sasin ba salvasaun ne'ebé besik ona atu to'o. Profeta tenke iha konxiénsia kona-ba ninia papél no ninia fatin: nia la'ós "naroman"; nia misaun la'ós lori ema sira atu adere ba nia an rasik, maibé ba Jezús. Profeta ida tenke iha kuidadu atu keta no nunka hadau no foti Maromak nia fatin.